

**ЎЗБЕКИСТОН РЕСПУБЛИКАСИ**  
**ҚОНУН ҲУЖЖАТЛАРИ**  
**ТЎПЛАМИ**

**17-сон**  
**(101)**  
**2004 й.**  
**апрель**

---

*Ўзбекистон Республикаси Қонун ҳужжатлари тўплами беш бўлимдан иборат:*

*тўпламнинг биринчи бўлимида Ўзбекистон Республикаси қонунлари ва Олий Мажлиснинг қарорлари эълон қилинади;*

*иккинчи бўлимда Ўзбекистон Республикаси Президентининг фармон ва фармойишлари эълон қилинади;*

*учинчи бўлимда Вазирлар Маҳкамасининг қарор ва фармойишлари эълон қилинади;*

*тўртинчи бўлимда Ўзбекистон Республикаси Конституциявий судининг қарорлари эълон қилинади;*

*тўпламнинг бешинчи бўлимида вазирликлар, давлат қўмиталари ва идораларининг Ўзбекистон Республикаси Адлия вазирлигида давлат рўйхатидан ўтказилган норматив-ҳуқуқий ҳужжатлари эълон қилинади.*

**МУНДАРИЖА**

*Иккинчи бўлим*

196. Ўзбекистон Республикасининг транспорт қурилиши корхоналарини бошқариш тизимини такомиллаштириш тўғрисида» Ўзбекистон Республикаси Президентининг 1992 йил 1 декабрдаги ПФ-504-сон Фармонини ўз кучини йўқотган деб ҳисоблаш ҳақида» Ўзбекистон Республикаси Президентининг 2004 йил 28 апрелдаги ПФ-3421-сон Фармони

*Учинчи бўлим*

197. «Лизинг хизматларини янада ривожлантириш чора-тадбирлари тўғрисида» Ўзбекистон Республикаси Вазирлар Маҳкамасининг 2004 йил 26 апрелдаги 199-сон қарори

198. «Ўзбекистон давлат транспорт қурилиши корхоналари уюшмаси («Ўзбектранс-қурилиш»)ни тугатиш чора-тадбирлари тўғрисида» Ўзбекистон Республикаси Вазирлар Маҳкамасининг 2004 йил 28 апрелдаги 202-сон қарори [Кўчирма]

199. «Ўзбекистон Республикаси Ҳукуматининг айрим қарорларига ўзгартириш ва қўшимчалар киритиш тўғрисида» Ўзбекистон Республикаси Вазирлар Маҳкамасининг 2004 йил 29 апрелдаги 203-сон қарори

200. «Аммиакли селитрани ишлаб чиқариш, ташиш ва сотишни назорат қилишга доир қўшимча чора-тадбирлар тўғрисида» Ўзбекистон Республикаси Вазирлар Маҳкамасининг 2004 йил 30 апрелдаги 204-сон қарори [Кўчирма]
201. «Ўзбекистон радиоэлектроника, электротехника ва асбобсозлик саноати корхоналари уюшмаси («Ўзэлтехсаноат» уюшмаси) фаолиятини такомиллаштириш тўғрисида» Ўзбекистон Республикаси Вазирлар Маҳкамасининг 2004 йил 30 апрелдаги 205-сон қарори

#### *Бешинчи бўлим*

202. «Фойдали моделга Ўзбекистон Республикасининг патенти берилиши учун талабномаларни тузиш, топшириш ва кўриб чиқиш қоидаларини тасдиқлаш тўғрисида» Ўзбекистон Республикаси Давлат патент идорасининг 2004 йил 15 мартдаги 14-сон буйруғи. (*Ўзбекистон Республикаси Адлия вазирлиги томонидан 2004 йил 29 апрелда 1343-сон билан давлат рўйхатидан ўтказилди*)
203. «Тижорат банклари томонидан банк карталарини чиқариш ва уларни Ўзбекистон Республикасида муомалада бўлиши тартиби тўғрисидаги низомни тасдиқлаш ҳақида» Ўзбекистон Республикаси Марказий банки Бошқарувининг 2004 йил 21 февралдаги 4/20-сон қарори. (*Ўзбекистон Республикаси Адлия вазирлиги томонидан 2004 йил 30 апрелда 1344-сон билан давлат рўйхатидан ўтказилди*)
204. «Тижорат банклари томонидан фермер хўжаликларининг ер участкасини ижарага олиш ҳуқуқини гаровга олган ҳолда кредитлаш тартиби тўғрисидаги низомни тасдиқлаш ҳақида» Ўзбекистон Республикаси Марказий банки Бошқарувининг 2004 йил 1 мартдаги 564-сон қарори. (*Ўзбекистон Республикаси Адлия вазирлиги томонидан 2004 йил 30 апрелда 1345-сон билан давлат рўйхатидан ўтказилди*)

Вазирликлар, давлат қўмиталари ва идораларининг умумий мажбурий тусдаги меъёрий ҳужжатларини давлат рўйхатидан ўтказиш ҳолати тўғрисида 2004 йил 24 апрелдан 30 апрелгача бўлган маълумот

**ИККИНЧИ БЎЛИМ**

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ФАРМОНИ

**196** «Ўзбекистон Республикасининг транспорт қурилиши корхоналарини бошқариш тизимини такомиллаштириш тўғрисида» Ўзбекистон Республикаси Президентининг 1992 йил 1 декабрдаги ПФ–504-сон Фармонини ўз кучини йўқотган деб ҳисоблаш ҳақида

«Ўзбекистон Республикасининг транспорт қурилиши корхоналарини бошқариш тизимини такомиллаштириш тўғрисида» Ўзбекистон Республикаси Президентининг 1992 йил 1 декабрдаги ПФ–504-сон Фармони ўз кучини йўқотган деб ҳисоблансин.

**Ўзбекистон Республикаси Президенти И. КАРИМОВ**

Тошкент ш.,  
2004 йил 28 апрель,  
ПФ–3421-сон

## УЧИНЧИ БЎЛИМ

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

### **197** Лизинг хизматларини янада ривожлантириш чора-тадбирлари тўғрисида

Лизинг операцияларини янада ривожлантириш, улардан корхоналарни ташкил этиш ва замонавийлаштириш учун самарали фойдаланиш, корхоналарни рақобатбардош маҳсулотлар ишлаб чиқаришни кўпайтиришни таъминловчи замонавий асбоб-ускуналар ва технологиялар билан жиҳозлаш мақсадида Вазирлар Маҳкамаси **қарор қилади:**

1. Солиқ солинадиган даромадлар (фойда)ни аниқлашда лизингга олувчиларнинг 2009 йил 1 январгача лизингга олинган асосий воситалар бўйича жами даромадидан амортизация ажратмалари жами суммасини, шу жумладан қонун ҳужжатларига мувофиқ тезлаштирилган усул билан ҳисобланган суммани чегириб ташлаш ҳуқуқига эга бўлишига доир тартиб белгилаб қўйилсин.

Ўзбекистон Республикаси Давлат солиқ қўмитаси ушбу қарорда белгиланган тартибга қатъий амал қилсин.

2. Ўзбекистон Республикаси Молия вазирлиги манфаатдор вазирликлар ва идоралар билан биргаликда, 2004 йил 1 январдан бошлаб барча хўжалик юритувчи субъектлар учун Молия-хўжалик фаолияти бухгалтерия ҳисобининг янги ҳисобкитоблар режаси жорий қилинишини ҳисобга олган ҳолда, икки ҳафта муддатда Бухгалтерия ҳисобида лизинг операцияларини акс эттириш тартибини ишлаб чиқсин ва белгиланган тартибда тасдиқласин.

3. Ўзбекистон Республикаси Ҳукуматининг иловага мувофиқ айрим қарорларига ўзгартириш ва қўшимчалар киритилсин.

4. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Р.С. Азимов зиммасига юклансин.

**Вазирлар Маҳкамасининг Раиси И. КАРИМОВ**

Тошкент ш.,  
2004 йил 26 апрель,  
199-сон

Вазирлар Маҳкамасининг  
2004 йил 26 апрелдаги 199-сон қарорига  
ИЛОВА

### **Ўзбекистон Республикаси Ҳукуматининг айрим қарорларига киритилаётган ўзгартириш ва қўшимчалар**

1. Вазирлар Маҳкамасининг 1994 йил 3 ноябрдаги 533-сон қарори (Ўзбекистон Республикаси ҚТ, 1994 й., 11-сон, 49-модда) билан тасдиқланган Давлат бож-

---

*Ўзбекистон Республикаси Қонун ҳужжатлари тўплами, 2004 й.*

лари ставкалари 4-бандининг «у» кичик бандига қўйидаги мазмундаги изоҳ қўшилсин:

«**Изоҳ.** Лизинг объектининг лизинг берувчи талаби бўйича ижро хатлари ёзиб беришда, лизинг шартномасида белгиланган тўланмаган тўловлар суммасидан лизинг шартномаси муддати тугашигача қолган даврга лизинг берувчи даромадини чегирган ҳолда давлат божи ундирилади».

II. Вазирлар Маҳкамасининг «Автомототранспорт воситаларини рўйхатдан ўтказиш, қайта рўйхатдан ўтказиш ва уларнинг ҳисобини олиб бориш, миллий давлат рақами белгиларини бериш ва уларни алмаштириш ишларини тартибга солиш ҳақида» 1997 йил 26 майдаги 256-сон қарорига 1-иловада:

а) II бўлим 16-бандининг биринчи хатбоши қўйидаги таҳрирда баён қилинсин:

«16. Юридик шахслар транспорт воситаларини рўйхатдан ўтказишда юридик шахснинг давлат рўйхатидан ўтказилганлиги тўғрисидаги гувоҳнома нусхасини тақдим этадилар»;

б) V бўлим 1-банди «в» кичик бандининг учинчи хатбошидаги «олди-сотди, ҳада, айирбошлаш» сўзларидан кейин «лизинг, сублизинг» сўзлари қўшилсин;

в) қўйидаги мазмундаги VII бўлим қўшилсин:

#### **«VII. Лизинг объекти ҳисобланган транспорт воситаларини рўйхатдан ўтказиш**

1. Жисмоний шахс ёки юридик шахс томонидан мулк сифатида сотиб олинган ва жисмоний шахс ёки юридик шахсга вақтинча эгалик қилиш ва фойдаланиш ҳуқуқи билан лизинг шартномаси ёки сублизинг шартномаси асосида берилган транспорт воситалари, лизингга берувчи номига ёки лизингга олувчи номига томонларнинг ёзма битими бўйича (белгиланган намунадаги бланкаларда) рўйхатдан ўтказилади.

2. Лизингга берувчи номига транспорт воситаларини рўйхатдан ўтказиш умумий асосларда лизинг берувчи жойлашган жойда амалга оширилади.

3. Лизингга берувчи томонидан лизингга олувчига лизингга олувчи номига рўйхатдан ўтказишни назарда тутувчи лизинг ёки сублизинг шартномасига асосан вақтинчалик эгалик ва фойдаланиш ҳуқуқи берилган транспорт воситалари шартнома амал қилиш муддатига лизингга олувчининг жойлашган жойи бўйича қўйидагиларга асосан рўйхатдан ўтказилади:

лизингга берувчининг транспорт воситаларига мулк эгаси ҳуқуқини тасдиқловчи ҳужжатлар (олди-сотди шартномаси, маълумотнома-ҳисоб рақами ва/ёки давлат ордери ва бошқалар);

лизинг ёки сублизинг шартномаси;

транспорт воситасининг рўйхатдан ўтказиш гувоҳномаси (агар транспорт воситаси илгари Ўзбекистон Республикасида рўйхатдан ўтказилган тақдирда);

транспорт воситалари Ўзбекистон Республикаси ҳудудига вақтинчалик олиб кирилганда — божхона органлари томонидан берилган тегишли ҳужжатлар;

лизингга олувчининг, агар у юридик шахс бўлса, давлат рўйхатидан ўтказилганлиги тўғрисидаги гувоҳнома нусхаси.

4. Транспорт воситаларини лизингга олувчи номига рўйхатдан ўтказиш лизинг ёки сублизинг шартномасида ёхуд транспорт воситалари Ўзбекистон Республикаси ҳудудига вақтинчалик олиб кирилганда божхона органлари томонидан берилган ҳужжатларда кўрсатилган муддатга рўйхатдан ўтказиш гувоҳномаси берилган ҳолда амалга оширилади. Бунда лизингга берувчининг рухсатсиз транспорт воситалари ҳисобдан чиқарилмайди.

5. Транспорт воситаларини лизингга олувчи номига рўйхатдан ўтказишда бериладиган рўйхатдан ўтказиш гувоҳномасининг «Муҳим белгилар» устунига «Лизинг, вақтинча ҳисобда туриши \_\_\_\_\_гача» ёзуви ёзилади ва транспорт воситасини рўйхатдан ўтказиш муддатининг тамом бўлиш санаси кўрсатилади, лизинг (сублизинг) шартномасининг тартиб рақами ва шартноманинг тузилган санаси қўйилади.

6. Лизинг шартномаси муддати тугагач лизингга олувчи номига рўйхатдан ўтказилган транспорт воситаси белгиланган тартибда ҳисобдан чиқарилади. Транспорт воситаларини рўйхатдан ўтказиш, шунингдек транспорт воситаларини ҳисобдан чиқаришга асос бўлган ҳужжатлар тикиб қўйилади ва ҳужжатлар белгиланган тартибда сақланади.

7. Транспорт воситаларига мулк эгаси ҳуқуқи лизингга олувчига ўтишини назарда тутувчи лизинг шартномаси асосида лизингга берувчи ёки лизингга олувчи номига рўйхатдан ўтказилган транспорт воситалари транспорт воситасига мулк эгаси ҳуқуқи лизингга олувчига ўтиши тўғрисида лизингга берувчининг ёзма тасдиғи ва лизинг шартномаси асосида лизингга олувчи номига қайта рўйхатдан ўтказилади.

8. Транспорт воситаларига мулк эгаси ҳуқуқининг лизингга олувчига ўтишини назарда тутмайдиган лизинг шартномасининг амал қилиш муддати тугагач транспорт воситалари ҳисобдан чиқарилиши ва фақат кўрсатилган транспорт воситаларига мулк эгаси ҳуқуқи лизингга олувчига ўтишини тасдиқловчи тегишли ҳужжатлар асосида лизингга олувчи номига рўйхатдан ўтказилиши мумкин.

9. Лизинг шартномаси бекор қилинганда ва лизингга олувчи номига рўйхатдан ўтказилган транспорт воситалари лизингга берувчига қайтарилганда, кўрсатилган транспорт воситалари лизингга берувчи ва лизингга олувчининг биргаликдаги ёзма аризаси ёки суд органлари ёки бошқа органларнинг ижро ҳужжати нусхаси илова қилинган ҳолда лизингга берувчининг ёзма аризаси асосида лизингга берувчига қайта расмийлаштирилади. Лизинг шартномасининг муддати тугаганда уни ўз вақтида қайта рўйхатдан ўтказилиши учун лизингга берувчи ҳам, лизингга олувчи ҳам жавоб беради»;

г) VII бўлим VIII бўлим деб ҳисоблансин.

III. Вазирлар Маҳкамасининг «Норматив ҳужжатларни тасдиқлаш тўғрисида» 1998 йил 6 майдаги 194-сон қарорида:

а) қарорнинг тўртинчи хатбоши ва қарорга 2-илова ўз кучини йўқотган деб ҳисоблансин;

б) 1-илованинг 8-банди қуйидаги таҳрирда баён қилинсин:

«8. Лизингга берувчи номига импорт бўйича келувчи товарларни божхонада расмийлаштиришда декларант ёки божхона брокери уларни қонун ҳужжатларига мувофиқ талаб қилинадиган ҳужжатлар билан бирга божхона органига тақдим этади».

IV. Вазирлар Маҳкамасининг «Нотариусларнинг ижро хатларига асосан қарзни ундириш сўзсиз амалга ошириладиган ҳужжатлар рўйхатини тасдиқлаш тўғрисида» 2002 йил 18 январдаги 26-сон қарорига (Ўзбекистон Республикаси ҚТ, 2002 й., 1-сон, 4-модда) иловага қуйидаги мазмундаги XI бўлим қўшилсин:

**«XI. Лизингга олувчидан қарзни ундириш ва лизинг объектини талаб қилиб олиш**

15. Лизингга олувчининг қарзини тасдиқловчи ҳужжатлар.

Ижро хатларини олиш учун қуйидагилар тақдим этилади:

а) қарзни ундириш ва/ёки лизинг объектини талаб қилиб олишни амалга

оширишга асос бўладиган лизинг шартномасининг асл нусхаси;

б) лизингга олувчининг лизингга берувчи олдидаги қарзини тасдиқлайдиган икки томонлама таққослаш далолатномаси;

в) лизингга олувчининг огоҳлантиришни олганлиги тўғрисидаги тилхати билан бирга қарзни қайтариш тўғрисида огоҳлантириш хатининг нусхаси».

V. Ўзбекистон Республикаси Вазирлар Маҳкамасининг «Ўзавтойўл» давлат-акциядорлик компанияси ва Ўзбекистон Республикаси Молия вазирлиги ҳузуридаги Республика йўл жамғармаси фаолиятини ташкил этиш масалалари тўғрисида» 2003 йил 21 августдаги 361-сон қарорига (Ўзбекистон Республикаси ҚТ, 2003 й., 8-сон, 74-модда) 6-иловада:

7-банднинг «а» кичик бандидаги «мазкур банднинг «б», «в», «г», «д», «ж» кичик бандларида» сўзлари «мазкур банднинг «б», «в», «в<sup>1</sup>», «г», «д», «ж» кичик бандларида» сўзлари билан алмаштирилсин;

7-бандга қуйидаги мазмундаги «в<sup>1</sup>» кичик банди қўшилсин:

«в<sup>1</sup>) асосий фаолияти лизингга мол-мулк тақдим этиш бўлган корхоналар томонидан маблағларидан — лизинг бўйича даромадлари (фоизлари) суммасидан мажбурий ажратмалар ҳисобига шакллантирилади»;

31-бандга қуйидаги мазмундаги хатбоши қўшилсин:

«лизинг ёки сублизинг шартномаси бўйича — шартномада қайтариб олиш қийматини тўламасдан автотранспорт воситасига мулк эгаси ҳуқуқи ўтиши назарда тутилган тақдирда ва барча лизинг тўловлари тўланган тақдирда, лизингга олувчилар».

VI. Вазирлар Маҳкамасининг «Ўзбекистон Республикасининг 2004 йилги Давлат бюджети параметрлари тўғрисида» 2003 йил 25 декабрдаги 567-сон қарорига «Ўзбекистон Республикаси Молия вазирлиги ҳузуридаги Республика йўл жамғармасига ажратмалар ва йиғимлар ставкалари» номли 20-илова жадвалидаги 5-бандга қуйидаги мазмундаги хатбоши қўшилсин:

«Асосий фаолияти лизингга мол-мулк тақдим этиш бўлган корхоналар томонидан маблағлар ажратиш — лизинг бўйича даромад (фоизлар) суммасидан».

#### ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

## 198 Ўзбекистон давлат транспорт қурилиши корхоналари уюшмаси («Ўзбектранскурилиш»)ни тугатиш чора-тадбирлари тўғрисида

### [Кўчирма]

Ўзбекистон Республикаси Президентининг «Хўжалик бошқаруви органлари тизимини такомиллаштириш тўғрисида» 2003 йил 22 декабрдаги ПФ-3366-сон Фармонида мувофиқ Вазирлар Маҳкамаси **қарор қилади:**

1. Ўзбекистон давлат транспорт қурилиши корхоналари уюшмаси («Ўзбектранскурилиш») қатнашчилари умумий йиғилиши томонидан уни тугатиш тўғрисида қарор қабул қилинганлиги маълумот учун қабул қилинсин.

2. «Ўзбектранскурилиш» давлат уюшмасини тугатиш билан боғлиқ ишларни мувофиқлаштириш учун 1-иловага\* мувофиқ таркибда ишчи комиссия ташкил этилсин.

3. Ишчи комиссия:

«Ўзбектранскурилиш» давлат уюшмасини қонун ҳужжатларида белгиланган тартибда тугатиш чора-тадбирларини амалга оширсин;

тугатилаётган «Ўзбектранскурилиш» давлат уюшмаси таркибига кирган корхоналарда бошқарув ходимлари сонини Вазирлар Маҳкамасининг «Давлат ва хўжалик бошқаруви республика органларининг бошқарув ходимлари сонини мақбуллаштириш ва қисқартириш тўғрисида» 2004 йил 5 январдаги 1-сон қарорига мувофиқ қисқартирсин.

4. Ўзбекистон Республикаси Меҳнат ва аҳолини ижтимоий муҳофаза қилиш вазирлиги ишчи комиссия билан биргаликда «Ўзбектранскурилиш» давлат уюшмаси тугатилиши муносабати билан ишдан бўшаб қолаётган ходимларни ишга жойлаштириш чора-тадбирларини кўрсин.

6. Ўзбекистон Республикаси Ҳукуматининг 2-иловага мувофиқ айрим қарорлари ўз кучини йўқотган деб ҳисоблансин.

7. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Р.Ф. Файзуллаев зиммасига юклансин.

**Вазирлар Маҳкамасининг Раиси И. КАРИМОВ**

Тошкент ш.,  
2004 йил 28 апрель,  
202-сон

Вазирлар Маҳкамасининг  
2004 йил 28 апрелдаги 202-сон қарорига  
2-ИЛОВА

### **Ўзбекистон Республикаси Ҳукуматининг ўз кучини йўқотган қарорлари рўйхати**

1. Вазирлар Маҳкамасининг «Ўзбекистон давлат транспорт қурилиши корхоналари уюшмаси («Ўзбектранскурилиш») фаолиятини ташкил этиш масалалари тўғрисида» 1993 йил 8 февралдаги 65-сон қарори.

2. Вазирлар Маҳкамасининг «Капитал қурилишни бошқариш ташкилий тузилмасини янада такомиллаштириш чора-тадбирлари тўғрисида» 1998 йил 28 ноябрдаги 500-сон қарорига 3 ва 4-иловалар.

---

\* 1-илова берилмайди.



ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

## **199** Ўзбекистон Республикаси Ҳукуматининг айрим қарорларига ўзгартириш ва қўшимчалар киритиш тўғрисида

Вазирлар Маҳкамаси қарор қилади:

1. Ўзбекистон Республикаси Ҳукуматининг иловага мувофиқ айрим қарорларига ўзгартириш ва қўшимчалар киритилсин.

2. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Р.С. Азимов зиммасига юклансин.

**Вазирлар Маҳкамасининг Раиси И. КАРИМОВ**

Тошкент ш.,  
2004 йил 29 апрель,  
203-сон

Вазирлар Маҳкамасининг  
2004 йил 29 апрелдаги 203-сон қарорига  
ИЛОВА

### **Ўзбекистон Республикаси Ҳукуматининг айрим қарорларига киритилаётган ўзгартириш ва қўшимчалар**

1. Вазирлар Маҳкамасининг 1993 йил 12 мартдаги 132-сон қарори (Ўзбекистон Республикаси ҚТ, 1993 й., 3-сон, 9-модда) билан тасдиқланган Ўзбекистон Республикаси ҳудудида фаолият кўрсатаётган жамоат бирлашмалари уставларини рўйхатга олиш тўғрисидаги аризаларни кўриб чиқиш қоидаларининг 1-бандига қуйидаги мазмундаги хатбоши қўшилсин:

«Халқаро ва хорижий нодавлат нотижорат ташкилотларнинг ваколатхоналари ва филиалларини рўйхатдан ўтказиш қонун ҳужжатларида белгиланган тартибда амалга оширилади».

2. Вазирлар Маҳкамасининг 1993 йил 19 августдаги 423-сон қарори билан тасдиқланган Ўзбекистон Республикаси консуллик йиғимлари тарифига изоҳларнинг 6-банди қуйидаги таҳрирда баён қилинсин:

«6. Ўзбекистон Республикаси Ташқи ишлар вазирлигида аккредитация қилинган хорижий давлатларнинг доимий ваколатхоналари, халқаро ҳукуматлараро ташкилотларнинг ваколатхоналари ҳамда хорижий давлатларнинг ҳукумат ташкилотлари, Ўзбекистон Республикаси Адлия вазирлигида рўйхатдан ўтказилган халқаро ва хорижий нодавлат (ҳукуматга қарашли бўлмаган) нотижорат ташкилотларнинг ваколатхоналари ва филиаллари ходимларидан (уларнинг оила аъзоларидан), Ўзбекистон Республикаси Ташқи ишлар вазирлигида аккредитация қилинган матбуот вакиллари (уларнинг оила аъзоларидан), мурувват ёрдамчини кузатиб боровчи хорижий фуқаролардан, шунингдек 16 ёшгача бўлган болалардан консуллик йиғимлари ундирилмайди. Кўрсатиб ўтилган шахслар визаларни расмийлаштириш ва бериш бўйича консуллик ишларини бажариш билан боғлиқ бўлган бошқа йиғимларни тўлашдан ҳам озод қилинадилар».

---

*Ўзбекистон Республикаси Қонун ҳужжатлари тўплами, 2004 й.*

3. Вазирлар Маҳкамасининг «Ўзбекистон Республикаси фуқароларининг чет элдаги ҳамда хорижий фуқароларнинг республикадаги касб фаолияти тўғрисида» 1995 йил 19 октябрдаги 408-сон қарорига (Ўзбекистон Республикаси ҚТ, 1995 й., 10-сон, 41-модда) 2-иловининг 17-бандида:

учинчи хатбоши қўйидаги таҳрирда баён қилинсин:

«б) Ўзбекистон Республикаси Ташқи ишлар вазирлигида аккредитация қилинган хорижий давлатларнинг халқаро ҳукуматлараро ташкилотлари ва ҳукумат ташкилотлари ваколатхоналари ходимларига»;

қўйидаги мазмундаги тўққизинчи хатбоши қўшилсин:

«Ўзбекистон Республикаси Адлия вазирлигида аккредитация қилинган халқаро ва хорижий нодавлат (ҳукуматга қарашли бўлмаган) нотижорат ташкилотларнинг ваколатхоналари ва филиаллари ходимларига».

4. Вазирлар Маҳкамасининг «Хорижий фуқароларнинг ва фуқаролиги бўлмаган шахсларнинг Ўзбекистон Республикасига келишлари, кетишлари, бу ерда бўлишлари ва транзит ўтишлари тартиби тўғрисида» 1996 йил 21 ноябрдаги 408-сон қарорида:

а) Хорижий фуқароларнинг ва фуқаролиги бўлмаган шахсларнинг Ўзбекистон Республикасига келишлари ва Ўзбекистон Республикасидан кетишлари тартиби»да (1-илова):

3-банднинг «а» кичик банди қўйидаги таҳрирда баён қилинсин:

«а) Ўзбекистон Республикаси Ташқи ишлар вазирлигида аккредитация қилинган хорижий давлатларнинг доимий ваколатхоналари, халқаро ҳукуматлараро ташкилотлар ва хорижий давлатларнинг ҳукумат ташкилотлари ваколатхоналари, Ўзбекистон Республикаси Адлия вазирлигида рўйхатдан ўтказилган халқаро ва хорижий нодавлат (ҳукуматга қарашли бўлмаган) нотижорат ташкилотларнинг ваколатхоналари ва филиаллари ходимларига (ва уларнинг қарамоғида бўлган уларнинг оила аъзоларига), шунингдек Ташқи ишлар вазирлигида аккредитация қилинган матбуот вакилларига ва уларнинг қарамоғида бўлган уларнинг оила аъзоларига»;

6-банднинг «а» кичик бандидаги «Ташқи иқтисодий алоқалар вазирлиги» сўзлари «Ташқи иқтисодий алоқалар агентлиги» сўзлари билан алмаштирилсин;

10-банд қўйидаги таҳрирда баён қилинсин:

«10. Юридик шахслар ёки Ўзбекистон Республикаси Ташқи ишлар вазирлигида аккредитация қилинган хорижий давлатларнинг доимий ваколатхоналари, халқаро ҳукуматлараро ташкилотлар ва хорижий давлатларнинг ҳукумат ташкилотлари ваколатхоналари, хорижий фуқароларнинг, шунингдек Ўзбекистон Республикаси Адлия вазирлигида рўйхатдан ўтказилган халқаро ва хорижий нодавлат (ҳукуматга қарашли бўлмаган) нотижорат ташкилотларнинг ваколатхоналари ва филиаллари таклифи бўйича Ўзбекистон Республикасига келмоқчи бўлган хорижий фуқаролар визалар олиш учун Ўзбекистон Республикасининг чет элдаги консуллик муассасаларига, бундай муассасалар бўлмаган тақдирда — Ўзбекистон Республикаси учун консуллик функцияларини бажариш юзасидан келишиб олинган бошқа давлатлар консуллик муассасаларига икки нусхада тўлдирилган белгиланган шаклдаги виза анкетасига таклифнома ва миллий паспортни ёки унинг ўрнини босадиган ҳужжатни (кейинги ўринларда матнда «миллий паспорт» деб юритилади) илова қилган ҳолда мурожаат қиладилар.

Ўзбекистон Республикаси Адлия вазирлигида рўйхатдан ўтказилган хорижий фуқаролар — халқаро ва хорижий нодавлат (ҳукуматга қарашли бўлмаган) нотижорат ташкилотларнинг ваколатхоналари ва филиаллари ходимлари ҳамда уларнинг оила аъзолари Ўзбекистон Республикаси Адлия вазирлигининг аккредитация қар-

точкаси асосида виза олиш ва унинг амал қилиш муддатини узайтириш учун мурожаат қиладилар.

Юридик шахслар ёки Ўзбекистон Республикаси Ташқи ишлар вазирлигида аккредитация қилинган хорижий давлатларнинг доимий ваколатхоналари, халқаро ҳукуматлараро ташкилотлар ва хорижий давлатларнинг ҳукумат ташкилотлари ваколатхоналари, шунингдек Ўзбекистон Республикаси Адлия вазирлигида рўйхатдан ўтказилган халқаро ва хорижий нодавлат (ҳукуматга қарашли бўлмаган) нотижорат ташкилотларнинг ваколатхоналари ва филиаллари хорижий фуқароларга таклифномаларни фақат Ўзбекистон Республикаси Ташқи ишлар вазирлигига виза берилишида ёрдам кўрсатиш тўғрисида илтимоснома берганларидан кейингина юборадилар.

Ўзбекистон Республикаси Ташқи ишлар вазирлиги Ўзбекистон Республикаси Ташқи ишлар вазирлигида аккредитация қилинган хорижий давлатларнинг доимий ваколатхоналари, халқаро ҳукуматлараро ташкилотлар ва хорижий давлатларнинг ҳукумат ташкилотлари ваколатхоналари, хорижий фуқароларнинг, шунингдек Ўзбекистон Республикаси Адлия вазирлигида рўйхатдан ўтказилган халқаро ва хорижий нодавлат (ҳукуматга қарашли бўлмаган) нотижорат ташкилотларнинг ваколатхоналари ва филиалларининг ёзма мурожаатларини кўриб чиқади ва чет элдаги консуллик муассасаларига тегишли кўрсатмалар юборди.

Юридик шахсларнинг таклифномаларига биноан Ўзбекистон Республикасига контракт ва шартномалар бўйича уч ойдан ортиқ муддатга ишга келаётган хорижий фуқароларга визалар бериш белгиланган тартибга мувофиқ Ташқи меҳнат миграцияси масалалари агентлиги томонидан хорижий фуқарога берилган меҳнат фаолиятига бўлган ҳуқуқни тасдиқловчи ҳужжатлар асосида амалга оширилади.

Ўзбекистон Республикаси Ташқи ишлар вазирлигида аккредитация қилинган хорижий фуқаролар — халқаро ҳукуматлараро ташкилотлар ва хорижий давлатларнинг ҳукумат ташкилотлари ходимлари ва уларнинг оила аъзолари, шунингдек Ўзбекистон Республикаси Ташқи ишлар вазирлигида аккредитация қилинган матбуот вакиллари ва уларнинг оила аъзолари Ўзбекистон Республикаси Ташқи ишлар вазирлигининг аккредитация карточкаси асосида визаларнинг амал қилиш муддатини узайтириш учун мурожаат қиладилар.

Виза бериш ҳужжатларини кўриб чиқиш ва хорижий фуқарога келиш визасини расмийлаштириш муддати 10 суткадан ошмаслиги керак;

б) Хорижий фуқароларнинг ва фуқаролиги бўлмаган шахсларнинг Ўзбекистон Республикасида бўлишлари қоидаларида (2-илова):

3-банддаги «дипломатик корпус ҳамда доимий хорижий ваколатхоналар» сўзлари «хорижий давлатларнинг доимий ваколатхоналари, халқаро ҳукуматлараро ташкилотлар ва хорижий давлатларнинг ҳукумат ташкилотлари ваколатхоналари, халқаро ва хорижий нодавлат (ҳукуматга қарашли бўлмаган) нотижорат ташкилотларининг ваколатхоналари» сўзлари билан алмаштирилсин;

14-банднинг «в» кичик бандидаги «халқаро ташкилотлар» сўзлари «халқаро ҳукуматлараро ташкилотлар ва хорижий давлатларнинг ҳукумат ташкилотлари» сўзлари билан алмаштирилсин;

27-банднинг биринчи хатбошидаги «Давлат автомобиль назорати» сўзлари «Давлат йўл ҳаракати хавфсизлиги хизмати» сўзлари билан алмаштирилсин».

5. Вазирлар Маҳкамасининг «Автомототранспорт воситаларини рўйхатдан ўтказиш, қайта рўйхатдан ўтказиш ва уларнинг ҳисобини олиб бориш, миллий давлат рақами белгиларини бериш ва уларни алмаштириш ишларини тартибга солиш ҳақида» 1997 йил 26 майдаги 256-сон қарорида:

а) 1-банднинг бешинчи хатбошидаги «халқаро ташкилотлар, хорижий фирмалар» сўзлари «халқаро ва хорижий ташкилотлар» сўзлари билан алмаштирилсин;

б) 4-иловада:

илова номидаги «халқаро ташкилотлар, хорижий фирмалар» сўзлари «халқаро ва хорижий ташкилотлар» сўзлари билан алмаштирилсин;

2-банднинг иккинчи хатбошидаги ва 3-банднинг иккинчи хатбошидаги «дипломатик, консуллик карточкаси» ва «дипломатик карточкалар» сўзлари тегишли равишда «аккредитация карточкаси» ва «аккредитация карточкалари» сўзлари билан алмаштирилсин;

4-банднинг биринчи ва иккинчи хатбоши қуйидаги тахрирда баён қилинсин:

«4. Чет эл дипломатик ва консуллик ваколатхоналари, халқаро банклар, халқаро ва хорижий нотижорат ташкилотларнинг маъмурий-техник ва хизмат кўрсатувчи ходимларига тегишли транспорт воситаларига бериладиган давлат рақами белгилари.

«Т» серияли махсус рақам белгилари элчихона, консуллик ваколатхонаси ёки халқаро банклар, халқаро ва хорижий нотижорат ташкилотларнинг сўров хати ҳамда тегишли равишда Ўзбекистон Республикаси Ташқи ишлар вазирлиги ёки Адлия вазирлиги томонидан тақдим этилган рўйхат асосида берилади. Шахсий автомобилларга «Т» серияли рақам белгиларини олиш учун тегишли равишда Ўзбекистон Республикаси Ташқи ишлар вазирлиги ва Адлия вазирлиги томонидан берилган аккредитация карточкаси тақдим этилади»;

6-банднинг учинчи хатбошидаги «ички ишлар органларида қайд этилган миллий паспорт» сўзлари «Ўзбекистон Республикаси Ташқи ишлар вазирлиги томонидан берилган аккредитация карточкаси» сўзлари билан алмаштирилсин.

6. Вазирлар Маҳкамасининг «Мурувват ёрдамидан ва беғараз техник кўмакдан мақсадли фойдаланилишини таъминлаш чора-тадбирлари тўғрисида» 2002 йил 26 июлдаги 268-сон қарорига 1-илованинг 3-банди (Ўзбекистон Республикаси ҚТ, 2002 й., 7-сон, 44-модда) қуйидаги тахрирда баён қилинсин:

«3. Ўзбекистонда мурувват ёрдами кўрсатувчи халқаро ва ҳукуматга қарашли бўлмаган хорижий ташкилотлар ваколатхоналари ва филиаллари Ўзбекистон Республикаси Адлия вазирлигида давлат рўйхатидан ўтадилар. Ўзбекистон Республикаси Вазирлар Маҳкамаси Ижтимоий комплексининг ҳулосаси халқаро ва ҳукуматга қарашли бўлмаган хорижий ташкилот ваколатхонаси ёки филиалини давлат рўйхатидан ва қайта рўйхатдан ўтказиш учун асос ҳисобланади».

7. Вазирлар Маҳкамасининг 2003 йил 31 январдаги 54-сон қарори (Ўзбекистон Республикаси ҚТ, 2003 й., 1-сон, 12-модда) билан тасдиқланган Транспорт воситаларини мажбурий техник кўриқдан ўтказиш тартиби тўғрисидаги низом 30-банднинг иккинчи хатбошидаги «Ўзбекистон Республикаси Ташқи ишлар вазирлигида аккредитация қилинган хорижий ташкилотлар ходимлари — Ўзбекистон Республикаси Ташқи ишлар вазирлигида рўйхатдан ўтказилган аккредитация карточкалари ва миллий паспортлари» сўзлари «Ўзбекистон Республикаси Ташқи ишлар вазирлигида ёки Адлия вазирлигида белгиланган тартибда аккредитация қилинган халқаро ва хорижий ташкилотлар ходимлари — тегишли равишда Ташқи ишлар вазирлиги ёки Адлия вазирлиги томонидан аккредитация қилинганлиги тўғрисида белги қўйилган аккредитация карточкалари ва миллий паспортлари» сўзлари билан алмаштирилсин.

8. Вазирлар Маҳкамасининг «Ўзбекистон Республикаси Адлия вазирлиги фаолиятини янада такомиллаштириш чора-тадбирлари тўғрисида» 2003 йил 27 августдаги 370-сон қарорида (Ўзбекистон Республикаси ҚТ, 2003 й., 8-сон, 79-модда):

5-банднинг иккинчи хатбошидаги «197» ва «146» рақамлари тегишли равишда «202» ва «151» рақамлари билан алмаштирилсин;

2-иловада:

7-банд 8-кичик бандининг иккинчи хатбоши қўйидаги таҳрирда баён қилинсин:

«нодавлат нотижорат ташкилотларини, шу жумладан жамоат бирлашмалари (диний ташкилотлар, сиёсий партиялар)ни, халқаро ва хорижий нодавлат (ҳукуматга қарашли бўлмаган) нотижорат ташкилотларнинг ваколатхоналари ва филиалларини давлат рўйхатидан ўтказди, кўрсатиб ўтилган ваколатхоналар ва филиалларнинг хорижий давлатлар фуқаролари бўлган ходимларини, шунингдек уларнинг қарамоғида бўлган оила аъзоларини аккредитациядан ўтказди»;

9-бандга қўйидаги мазмундаги 28<sup>1</sup>-кичик банд қўшилсин:

«28<sup>1</sup>. Халқаро ва хорижий нодавлат (ҳукуматга қарашли бўлмаган) нотижорат ташкилотлар ваколатхоналари ва филиалларининг ходимларини, улар томонидан Ўзбекистон Республикасининг қонун ҳужжатлари бузилган ҳолларда аккредитациядан маҳрум қилиш»;

4-иловада «Жамоат бирлашмалари ва диний ташкилотлар бошқармаси» устунидаги «8» рақами «13» рақами билан, «197» ва «146» рақамлари эса тегишли равишда «202» ва «151» рақамлари билан алмаштирилсин.

#### ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

## **200** Аммиакли селитрани ишлаб чиқариш, ташиш ва сотишни назорат қилишга доир қўшимча чора-тадбирлар тўғрисида

### [Кўчирма]

Мамлакат хавфсизлигини таъминлаш, аммиакли селитрани ишлаб чиқариш, тақсимлаш, ташиш ва сотишни назорат қилиш самарадорлигини ошириш, унинг йўқолиши, ўғирланиши ҳолларига, портловчи моддаларни яширин тайёрлаш учун ундан компонент сифатида фойдаланиш имкониятига йўл қўймаслик мақсадида Вазирлар Маҳкамаси **қарор қилади:**

1. Белгилаб қўйилсинки, аммиакли селитрани қишлоқ хўжалиги ва технология эҳтиёжлари учун:

экспортга етказиб бериш — минерал ўғитлар ишлаб чиқарувчи корхоналар томонидан, тузилган контрактларга мувофиқ;

қишлоқ хўжалиги корхоналарига етказиб бериш — «Ўзкимёсаноат» давлат-акциядорлик компаниясининг «Қишлоқхўжаликкимё» ҳудудий акциядорлик жамиятлари орқали, тузилган шартномалар асосида;

аммиакли селитрадан технология эҳтиёжлари учун фойдаланадиган корхоналарга етказиб бериш — минерал ўғитлар ишлаб чиқарувчи корхоналар билан тўғридан-тўғри шартномалар бўйича амалга оширилади.

Аммиакли селитра биржа савдоларида ва чакана савдода сотиладиган махсулотлар ва товарлар рўйхатидан чиқарилсин.

Аммиакли селитрани минерал ўғитлар сотишнинг оралиқ шохобчалари орқали сотиш тақиқлансин.

2. Белгилаб қўйилсинки, Вазирлар Маҳкамасининг «2004 йилда республика қишлоқ хўжалигини минерал ўғитлар билан таъминлаш чора-тадбирлари тўғрисида» 2004 йил 23 январдаги 34-сон қарорига 2-илованинг 1.1-бандидаги «қишлоқ хўжалиги товар ишлаб чиқарувчиларига бошқа маҳсулотлар етказиб бериш» кичик бандида кўрсатилган аммиакли селитра ҳажмлари қишлоқ хўжалиги маҳсулотлари етказиб бериш юзасидан давлат билан шартномавий мажбуриятларга эга бўлмаган қишлоқ хўжалиги товар ишлаб чиқарувчиларига «Қишлоқхўжаликкимё» ҳудудий акциядорлик жамиятлари орқали, шартномалар асосида, 100 фоиз ҳақини олдиндан тўлаш шарти билан ва етказиб беришнинг ҳар ойлик жадвалларига биноан сотилади.

5. «Ўзкимёсаноат» давлат-акциядорлик компанияси (Ф.И. Иброҳимов) 2004 йил 1 сентябргача бўлган муддатда тайёрловчи корхоналарда аммиакли селитрани (унинг суяқ эритмаларидан ташқари) қадоқлашни ва тегишли равишда маркалашни ташкил этиш чора-тадбирларини ишлаб чиқсин ва амалга оширсин.

6. Қишлоқ ва сув хўжалиги вазирлиги (С.Б. Бегалиев), «Ўзағромашсервис» уюшмаси (Ш.Н. Нишоннов) «Ўзкимёсаноат» давлат-акциядорлик компанияси (Ф.И. Иброҳимов) Қорақалпоғистон Республикаси Вазирлар Кенгаши, вилоятлар ҳокимликлари билан биргаликда бир ой муддатда қишлоқ хўжалиги маҳсулотлари етиштирувчиларга минерал ўғитлар солиш ва ўсимликларни ҳимоя қилиш воситаларини қўлланиш бўйича сервис хизматлари кўрсатувчи ихтисослаштирилган қишлоқ хўжалиги корхоналарини босқичма-босқич ташкил этиш тўғрисида таклифларни ишлаб чиқсинлар ва Ўзбекистон Республикаси Вазирлар Маҳкамасига киритсинлар.

7. Қишлоқ ва сув хўжалиги вазирлиги (С.Б. Бегалиев) қишлоқ хўжалиги экинлари турлари бўйича аммиакли селитрани сарфлаш нормаларини белгилаш тартибини ишлаб чиқсин ва тасдиқласин, улар асосида тегишли тавсияномаларни тайёрласин ҳамда қишлоқ хўжалиги товар ишлаб чиқарувчиларига етказсин.

8. Вазирлар Маҳкамасининг «Маҳсулотлар, хом ашё ва материалларнинг юқори ликвидли турларини сотишнинг бозор механизмларини жорий этишни давом эттириш тўғрисида» 2004 йил 5 февралдаги 57-сон қарори (Ўзбекистон Республикаси ҚТ, 2004 й., 2-сон, 10-модда) 3-иловасига 3-иловага мувофиқ ўзгартиришлар киритилсин.

9. Мазкур қарорнинг бажарилишини назорат қилиш Ўзбекистон Республикасининг Бош вазири Ш.М. Мирзиёев ва Ўзбекистон Республикаси Президенти ҳузуридаги Миллий хавфсизлик кенгаши Котиби Р.Э. Мирзаев зиммасига юклансин.

**Вазирлар Маҳкамасининг Раиси И. КАРИМОВ**

Тошкент ш.,  
2004 йил 30 март  
204-сон

Вазирлар Маҳкамасининг  
2004 йил 30 апрелдаги 204-сон қарорига  
3-ИЛОВА

**Вазирлар Маҳкамасининг «Маҳсулотлар, хом ашё ва материалларнинг юқори ликвидли турларини сотишнинг бозор механизмларини жорий этишни давом эттириш тўғрисида» 2004 йил 5 февралдаги 57-сон қарори 3-иловасига киритилаётган ўзгартиришлар**

1. 46-банд қуйидаги мазмундаги хатбоши билан тўлдирилсин:  
«Минерал ўғитларни сотишнинг мазкур тартиби давлат эҳтиёжлари учун маҳсулот етказиб бериш бўйича шартнома мажбуриятлари билан қамраб олинмаган қишлоқ хўжалиги маҳсулотлари етиштирувчиларига аммиакли селитра сотишга татбиқ этилмайди».
2. 47-банд қуйидаги мазмундаги хатбоши билан тўлдирилсин:  
«Давлат эҳтиёжлари учун маҳсулот етказиб бериш бўйича шартнома мажбуриятлари билан қамраб олинган қишлоқ хўжалиги маҳсулотлари етиштирувчиларига аммиакли селитра сотиш «Қишлоқхўжалиқкимё» ҳудудий акциядорлик жамиятлари томонидан, ярмарка савдолари ўтказилмасдан амалга оширилади».

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

**201 Ўзбекистон радиоэлектроника, электротехника ва асбобсозлик саноати корхоналари уюшмаси («Ўзэлтехсаноат» уюшмаси) фаолиятини такомиллаштириш тўғрисида**

Ўзбекистон Республикаси Президентининг «Хўжалиқ бошқаруви органлари тизимини такомиллаштириш тўғрисида» 2003 йил 22 декабрдаги ПФ–3366-сон Фармонини бажариш юзасидан ва радиоэлектроника, электротехника ва асбобсозлик тармоқларини бошқариш тузилмасини такомиллаштириш мақсадида Вазирлар Маҳкамаси **қарор қилади:**

1. Қуйидагилар:  
1-иловага мувофиқ корхоналар «Ўзэлтехсаноат» уюшмаси қатнашчилари ҳисобланиши;  
уюшманинг фаолияти унинг таркибига кирувчи корхоналар, ташкилотларнинг ихтиёрий ажратиладиган маблағлари ва қонун ҳужжатларида тақиқланмаган бошқа маблағлар ҳисобига амалга оширилиши;  
«Ўзэлтехсаноат» уюшмаси ижро этувчи органининг ҳуқуқлари, функциялари, жавобгарлиги ва вазифалари унинг қатнашчиларининг умумий йиғилиши томонидан белгиланиши маълумот учун қабул қилинсин.
2. «Ўзэлтехсаноат» уюшмаси қатнашчиларининг қуйидагилар уюшманинг асо-



сий вазифалари ва фаолияти йўналишлари ҳисобланиши ҳақидаги таклифига розилик берилсин:

илфор халқаро тажрибани ҳисобга олган ҳолда радиоэлектроника, электротехника ва асбобсозлик саноатини барқарор ривожлантиришнинг истиқболли стратегиясини белгилаш;

маркетинг тадқиқотларини ташкил этиш, ички ва ташқи бозорларда рақобатбардош маҳсулотлар (ишлар, хизматлар)нинг янги турларини ишлаб чиқаришни ўзлаштиришда, уларнинг жаҳон бозорларига кириб боришида кўмаклашиш;

уюшма қатнашчилари бўлган корхоналарга ресурс ва энергияни тежовчи самарали технологияларни жорий этишда, буюмлар ва бутловчи материаллар ишлаб чиқаришни маҳаллийлаштиришни ривожлантиришда, корхоналарни замонавийлаштириш ва технология билан қайта жиҳозлашда, ушбу мақсадлар учун хорижий инвестицияларни кенг жалб этишда ёрдам кўрсатиш;

корхоналарга ахборот хизматлари кўрсатиш, муҳандис-техник ва бошқарув ходимлари менежментнинг замонавий усулларини ва бозор шароитларида ишлашни эгаллаб олишлари мақсадида уларнинг малакасини ошириш, уларни тайёрлаш ва қайта тайёрлашни ташкил этишда кўмаклашиш.

3. «Ўзэлтехсаноат» уюшмасининг ташкилий тузилмаси ва ходимларнинг чекланган умумий сони 33,5 штат бирлиги, шу жумладан бошқарув ходимлари 22 киши бўлган унинг бошқарув ижро этувчи аппарати тузилмаси 2 ва 3-иловаларга мувофиқ маъқуллансин.

4. Ўзбекистон Республикаси Давлат мулки қўмитасининг «Ўзэлтехсаноат» уюшмаси таркибига кирувчи корхоналарнинг устав сармояларида акциялар (улушлар)нинг давлат пакетларини ишончли бошқарувга бериш тўғрисидаги шартномаларни улар танлов асосида профессионал бошқарувчи компанияларга берилгунгача узайтириш ҳақидаги таклифига розилик берилсин.

5. «Ўзэлтехсаноат» уюшмаси икки ой муддатда қатнашчиларнинг умумий йиғилишини ўтказсин, уюшманинг янги тахрирдаги уставини тасдиқласин ва давлат рўйхатидан ўтказиш учун Ўзбекистон Республикаси Адлия вазирлигига такдим этсин.

6. Ўзбекистон Республикаси Давлат божхона қўмитаси, Давлат статистика қўмитаси республикага олиб келинаётган радиоэлектроника, электротехника, асбобсозлик товарлари тўғрисида, уларни уюшма корхоналарида ишлаб чиқаришни ўзлаштириш учун мунтазам ахборот олишда «Ўзэлтехсаноат» уюшмасига кўмаклашсинлар.

7. Вазирлар Маҳкамасининг «Ўзэлтехсаноат» Ўзбекистон радиоэлектроника, электротехника ва асбобсозлик саноати корхоналари уюшмасини ташкил этиш ва унинг фаолияти масалалари тўғрисида» 1994 йил 17 мартдаги 144-сон қарори ўз кучини йўқотган деб ҳисоблансин.

8. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Ў.Т. Султонов зиммасига юклансин.

**Вазирлар Маҳкамасининг Раиси И. КАРИМОВ**

Тошкент ш.,  
2004 йил 30 апрель,  
205-сон



Вазирлар Маҳкамасининг  
2004 йил 30 апрелдаги 205-сон қарорига  
1-ИЛОВА

**«Ўзэлтехсаноат» уюшмаси қатнашчилари бўлган корхоналар  
рўйхати\***

**I. Кабель-сим маҳсулотлари, халқ истеъмол товарлари ва янги  
материаллар ишлаб чиқарадиган корхоналар**

1. «Ўзкабель» давлат-акциядорлик жамияти, Тошкент шаҳри
2. «Андижонкабель» очик акциядорлик жамияти Ўзбекистон-Россия қўшма корхонаси, Хонобод шаҳри
3. «Космос Ориентал Инвестмент ЛТД» хорижий компаниянинг (Гонконг) «Вика Энтерпрайз» шўъба корхонаси (Тошкент шаҳри)
4. «Дойче Кабель АГ Тошкент» очик акциядорлик жамияти Ўзбекистон-Германия қўшма корхонаси, Тошкент шаҳри
5. «Спектр» масъулияти чекланган жамият Ўзбекистон-Россия қўшма корхонаси, Тошкент шаҳри
6. «Ўзгласзайден» Ўзбекистон-Швейцария қўшма корхонаси, Тошкент шаҳри

**II. Паст вольтли аппаратлар, шчит қурилмалари, лифтлар ва халқ  
истеъмол товарлари ишлаб чиқарадиган корхоналар**

7. «Ўзэлектроаппарат» очик акциядорлик жамияти, Тошкент шаҳри
8. «Реле ва автоматика» очик акциядорлик жамияти, Тошкент шаҳри
9. «SABEN» очик акциядорлик жамияти, Тошкент шаҳри
10. «Самарқанд лифтқурилиши заводи» очик акциядорлик жамияти, Самарқанд шаҳри
11. «Элга-Осиё» масъулияти чекланган жамият Ўзбекистон-Россия қўшма корхонаси, Тошкент шаҳри
12. «Тошэлектроаппарат» масъулияти чекланган жамият Ўзбекистон-Буюк Британия қўшма корхонаси, Тошкент шаҳри

**III. Электрон техника, приборлар, алоқа аппаратлари ва халқ  
истеъмол товарлари ишлаб чиқарадиган корхоналар**

13. «Фотон» очик акциядорлик жамияти, Тошкент шаҳри
14. «Алгоритм» очик акциядорлик жамияти, Тошкент шаҳри
15. «Оникс» очик акциядорлик жамияти, Тошкент шаҳри
16. «Элекор» очик акциядорлик жамияти, Тошкент шаҳри
17. Давлат микроэлектроника илмий-тадқиқот институти, Тошкент шаҳри
18. «Кварк» давлат илмий-ишлаб чиқариш комплекси, Тошкент шаҳри
19. «Фотон» давлат тажриба-конструкторлик бюроси, Тошкент шаҳри
20. «УМТ-Радио» масъулияти чекланган жамият Ўзбекистон-Туркия қўшма корхонаси, Тошкент шаҳри

---

\* Уюшма унинг қатнашчиларини ихтиёрийлик асосида бирлаштиради.

21. «СМГ-Оникс» масъулияти чекланган жамият Ўзбекистон-Италия қўшма корхонаси, Тошкент шаҳри

**IV. Куч трансформаторлари, электротермик асбоб-ускуналар ва халқ истеъмол товарлари ишлаб чиқарадиган корхоналар**

22. «Трансформатор» очиқ акциядорлик жамияти, Тошкент вилояти, Чирчиқ шаҳри

23. «Ўзэлектротерм» очиқ акциядорлик жамияти, Наманган шаҳри

24. «Тошэлектромаш» очиқ акциядорлик жамияти, Тошкент шаҳри

25. «Электромаш» очиқ акциядорлик жамияти, Фарғона вилояти, Қўқон шаҳри

26. «Сино» очиқ акциядорлик жамияти, Самарқанд шаҳри

27. «Кинап» давлат ишлаб чиқариш бирлашмаси, Самарқанд шаҳри

**V. Сервис хизмати кўрсатадиган корхоналар**

28. «Электрремонт» очиқ акциядорлик жамияти, Навоий шаҳри

29. «Анзис» очиқ акциядорлик жамияти, Андижон вилояти, Асака шаҳри

30. «Компьютер-Спектр» масъулияти чекланган жамият, Тошкент шаҳри


31. «Электроника» масъулияти чекланган жамият, Тошкент шаҳри

32. «Электротаямир» масъулияти чекланган жамият, Самарқанд вилояти, Чароғон поселкаси


33. «Ҳисоблаш техникасини таъмирлаш ва техник хизмат кўрсатиш» масъулияти чекланган жамият, Тошкент шаҳри

34. «ТС-Технология» масъулияти чекланган жамият Ўзбекистон-Америка қўшма корхонаси, Тошкент шаҳри

### «Ўзэлтехсаноат» уюшмасининг ташкилий тузилмаси



«Ўзэлтехсаноат» уюмсининг ижро этувчи аппарати тузилмаси



ходимларнинг умумий сони — 33,5 штат бирлиги  
бошқарув ходимлари — 22 киши  
ёрдамчи ходимлар — 11,5 штат бирлиги

**БЕШИНЧИ БЎЛИМ**

ЎЗБЕКИСТОН РЕСПУБЛИКАСИ ДАВЛАТ ПАТЕНТ ИДОРАСИ  
ДИРЕКТОРИНИНГ БУЙРУҒИ

**202 Фойдали моделга Ўзбекистон Республикасининг патенти берилиши учун талабномаларни тузиш, топшириш ва кўриб чиқиш қоидаларини тасдиқлаш тўғрисида**

*Ўзбекистон Республикаси Адлия вазирлиги томонидан 2004 йил  
29 апрелда 1343-сон билан давлат рўйхатидан ўтказилди*

*(2004 йил 9 майдан кучга киради)*

Ўзбекистон Республикасининг «Ихтиролар, фойдали моделлар ва саноат намуналари тўғрисида»ги Қонунига мувофиқ **буюраман:**

1. Фойдали моделга Ўзбекистон Республикасининг патенти берилиши учун талабномаларни тузиш, топшириш ва кўриб чиқиш қоидалари иловага\* мувофиқ тасдиқлансин.

2. Ушбу Қоидалар кучга кирган санадан эътиборан Фан ва техника давлат комитети раиси томонидан 1997 йил 15 августда тасдиқланган Фойдали моделга Ўзбекистон Республикасининг гувоҳномаси берилиши учун талабномани тузиш қоидалари (1997 йил 10 сентябрь, рўйхат рақами 366-сон) ўз кучини йўқотган деб ҳисоблансин.

3. Мазкур буйруқ Ўзбекистон Республикаси Адлия вазирлигида давлат рўйхатидан ўтказилган вақтдан 10 кун ўтгандан сўнг кучга киради.

**Давлат патент идораси директори А. АЗИМОВ**

Тошкент ш.,  
2004 йил 15 март,  
14-сон

---

\* Илова рус тилидаги матнда берилади.

ЎЗБЕКИСТОН RESPUBLIKACI MАРКАЗИЙ БАНКИ БОШҚАРУВИНИНГ  
ҚАРОРИ**203** Тижорат банклари томонидан банк карталарини чиқариш ва уларни Ўзбекистон Республикасида муомалада бўлиши тартиби тўғрисидаги низомни тасдиқлаш ҳақида

*Ўзбекистон Республикаси Адлия вазирлиги томонидан 2004 йил  
30 апрелда 1344-сон билан давлат рўйхатидан ўтказилди*

*(2004 йил 10 майдан кучга киради)*

Ўзбекистон Республикасининг «Ўзбекистон Республикаси Марказий банки тўғрисида» Қонунининг 3, 7, 17 ва 51-моддаларига асосан Марказий банк Бошқаруви **қарор қилади:**

1. «Тижорат банклари томонидан банк карталарини чиқариш ва уларни Ўзбекистон Республикасида муомалада бўлиши тартиби тўғрисида низом» иловага\* мувофиқ тасдиқлансин.

2. Ушбу қарор Ўзбекистон Республикаси Адлия вазирлигида давлат рўйхатига олинган кундан 10 кун ўтгандан сўнг кучга киритилсин.

**Марказий банк Бошқаруви раиси Ф. МУЛЛАЖОНОВ**

Тошкент ш.,  
2004 йил 21 февраль,  
4/20-сон

---

\* Илова рус тилидаги матнда берилади.

ЎЗБЕКИСТОН РЕСПУБЛИКАСИ МАРКАЗИЙ БАНКИ БОШҚАРУВИНИНГ  
ҚАРОРИ**204** Тижорат банклари томонидан фермер хўжаликларининг ер участкасини ижарага олиш ҳуқуқини гаровга олган ҳолда кредитлаш тартиби тўғрисидаги низомни тасдиқлаш ҳақида

*Ўзбекистон Республикаси Адлия вазирлиги томонидан 2004 йил  
30 апрелда 1345-сон билан давлат рўйхатидан ўтказилди*

*(2004 йил 10 майдан кучга киради)*

Ўзбекистон Республикаси Президентининг 2003 йил 27 октябрдаги ПФ-3342-сонли «2004—2006 йилларда фермер хўжаликларини ривожлантириш концепцияси тўғрисида» Фармони, Ўзбекистон Республикаси Вазирлар Маҳкамасининг 2003 йил 30 октябрдаги 476-сонли «2004—2006 йилларда фермер хўжаликларини ривожлантириш концепциясини амалга ошириш чора-тадбирлари тўғрисида» қарори ижросини таъминлаш мақсадида Марказий банк Бошқаруви **қарор қилади:**

1. «Тижорат банклари томонидан фермер хўжаликларини ер участкасини ижарага олиш ҳуқуқини гаровга олган ҳолда кредитлаш тартиби тўғрисида низом» иловага\* мувофиқ тасдиқлансин.

2. Ушбу қарор Ўзбекистон Республикаси Адлия вазирлигида давлат рўйхатига олинган кундан 10 кун ўтгандан сўнг кучга киритилсин.

**Марказий банк Бошқаруви раиси Ф. МУЛЛАЖОНОВ**

Тошкент ш.,  
2004 йил 1 март,  
564-сон

---

\* Илова рус тилидаги матнда берилади.

**Ўзбекистон Республикаси**  
**Адлия вазирлиги маълум қилади:**  
**вазирликлар, давлат қўмиталари ва идораларининг**  
**умумий мажбурий тусдаги меъёрий ҳужжатларини давлат**  
**рўйхатидан ўтказиш ҳолати тўғрисида**  
**2004 йил 24 апрелдан 30 апрелгача бўлган маълумот**

**I. Давлат рўйхатидан ўтказилди:**

1. «Фойдали моделга Ўзбекистон Республикасининг патенти берилиши учун талабномаларни тузиш, топшириш ва кўриб чиқиш қоидаларини тасдиқлаш тўғрисида» *Ўзбекистон Республикаси Давлат патент идорасининг 2004 йил 15 мартдаги 14-сонли буйруғи.*

*2004 йил 29 апрелда 1343-сон билан рўйхатдан ўтказилди (2004 йил 9 майдан кучга киради).*

2. «Тижорат банклари томонидан банк карталарини чақариш ва уларни Ўзбекистон Республикасида муомалада бўлиши тартиби тўғрисида низомни тасдиқлаш ҳақида» *Ўзбекистон Республикаси Марказий банки бошқарувининг 2004 йил 21 февралдаги 4/20-сонли қарори.*

*2004 йил 30 апрелда 1344-сон билан рўйхатдан ўтказилди (2004 йил 10 майдан кучга киради).*

3. «Тижорат банклари томонидан фермер хўжалиklarининг ер участкасини гаровга олган ҳолда кредитлаш тартиби тўғрисида низомни тасдиқлаш ҳақида» *Ўзбекистон Республикаси Марказий банки бошқарувининг 2004 йил 1 мартдаги 564-сонли қарори.*

*2004 йил 30 апрелда 1345-сон билан рўйхатдан ўтказилди (2004 йил 10 майдан кучга киради).*

**II. Давлат реестридан чиқарилди:**

1. Фойдали моделга Ўзбекистон Республикасининг гувоҳномаларини бериш учун талабномаларни тузиш қоидалари. *Ўзбекистон Республикаси Фан ва техника давлат қўмитаси томонидан тасдиқланган (10.09.1997 й., рўйхат рақами 366-сон).*

*Адлия вазирининг 2004 йил 29 апрелдаги 98-мҳ-сон буйруғи билан реестрдан чиқарилди.*

**Мазкур ҳужжат амалдаги қонунчиликка ўзгартиришлар киритилиши ва янги норматив-ҳуқуқий ҳужжат қабул қилиниши муносабати билан давлат реестридан чиқарилди.**